

Tuesday, August 26, 2025

Time - 2:30pm - 2:35pm



ONLINE GAMING BILL

Mizoramah Online Games lama inbumna a hluar chho hle a, heng zingah hian Mobile Legends leh PUBG ah te inbumna a tam zual tih Mizoram Cyber Crime Police ten an sawi.

Akashvani Aizawl zawhna chhangin, Mizoram Cyber Crime Police hotute chuan online games hmanga inbumna thubuai chu kum 2023 atang khan Mizoramah awm chho tanin, kum 2024 ah chuan a hluar chho tawh hle an ti a, nitin thubuai lut ziah ang a nih thu an sawi a, Mobile Legends leh PUBG te chu inbumna tam zualna a ni tih sawiin, an inbum dan tlangpui chu PUBG leh Mobile Legends account hralh leh inleisak chungchangah niin Mizo leh Mizo bakah khawvel ram hrang hrang atang pawhin a awm thin an ti a, Mizo leh Mizo inbumte chu an chhuichhuak thei mai a, ram dang atanga bum tawk te chu chhuichhuah sak a har tawh thin tih an sawi a ni.

Cyber Crime Police te chuan tunhnaiah naupang zinga online games khel thin te chuan an games tih thatna atan an nu leh pa, pi leh pute hriatpui lovin an Gpay leh bank account hmangin pawisa tam tak lo hman sak thin an awm thu sawiin hetiang kawngah hian nu leh pa te fimkhur a tul thu an sawi bawk.

August ni 21 khan Parliament in hnih chuan The Promotion and Regulation of Online Gaming Bill 2025 an pass a, President Droupadi Murmu chuan he Bill hi a pawmpui zui nghal a ni.



PHED MINISTER

PHED Minister Prof. Lalnilawma'n nizan khan "AMRUT-2.0" hnuaia hmalakna pakhat septic tank atanga chhuak ek tui lakkhawma, sawngbawl thianghlimna tur a kawngpui verh hna thawh mek a enfiah.

PHED Minister hian Dawrpui, Bazar Bungkawn – Vaivakawn road a kawngpui verh hnathawh mek chu a hmunah kalchilhin an hnathawh dante a endik a, Minister chuan khawpui kawngpui awmdanin a zir loh avangin chhun lamah hna thawh a rem lova, lirthei veivak tamna hmun a nih vangin zan rei hnua hna thawh tan theih chauh a ni a ti a; khawl lian hmanga hna thawh a nih vangin kawngpui leh a chhehvela chengte tan pawh thawm bengchheng a siam dawn tih sawiin inthlahrunawm a tih thu a sawi a, mipuite leh khawtlang hruiatu local council ten khawtlang tana tha tur tih hria a dawhthei taka an dawnsawn thin vangin lawmthu a sawi bawk a ni.

He project hmang hian Tuikual Lui a thli luang khawm veng hrang hrang 10 ah pipe phum tur a ni a. He hna hmang hian ek thli te hi tui dawt hmanga lakhawmin sawngbawl thianghlim tur a ni dawn a ni.



WATER SCARCITY

Fur ruahtur tla in tui a tih nut nasat avang leh pipeline chhia a tam avangin Aizawl khawpui chhungah tui hnianghnar tawh hmuh theih a la ni lo a, PHE Department chuan hun engemaw chen Aizawlah tui sem a mumal theih dawnloh avangin mipuite hrethiam turin an ngen tih an sawi.

Public Health Engineering department chuan thuchhuah siamin Greater Aizawl Water Supply Scheme Phase I & Phase II in power supply an hmuh na ber 132kV Luangmual Sub-station a Isolator chu August ni 21 ni 23 thleng a thatloh avangin tui pump theih a ni lo an ti a, tun dinhmunah erawh isolator thlak ngai thlak fel tawh niin, tui pump pawh a pangai a chhunzawm lehnghal an ti a, hetih mek lai hian Phase III (SIPMIU) tui pump na pipeline chu a chhiat avangin June ni 2 atang khan vawiin thlengin tui pump theih a ni hrihlo a. Pipeline repair tur hian a tul ang a chak tak a hmalak mek niin chhan hrang hrang avang hian Aizawl khawpui tan a

tui pump chhuah a tlahniam nasa a, hei hian nasa takin khawpui chhung tuisem a nghawng thu an sawi a ni.

PHE hotute chuan Mipui te tui renchem tur leh ruahtui khawl lam a tan lo la zel turin an ngen thu sawiin tuisem khaihlak avanga mipui ten harsatna an tawh ah hriatthiamna an ngen tih an sawi bawk.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve ah Chanchinthar puan leh a ni ang.



EDUCATION MINISTER

School Education Minister Dr. Vanlalhlana’n Mizoram Secretariat chu e-filing system veka kalpui ani tawh a ti a, Department hrang hrangah pawh digital veka file kaltir tum ani tih a sawi.

School Education Department hnuaia hnathawk ten Ni 4 awb tur – Four Day Training on “Office Administration” an buatsaih a hmanpui na ah he thu hi sawiin Minister chuan tunlai thiamna hmang thiam turin hmasawn zawng ke pen theuh an mamawh thu a sawi a, Department thawktute chu chak taka hna an thawh theih nan tunlai thiamna kawngah inzir thar tum zel turin a chah a ni.

Minister chuan Department chhungah inrelbawlna tha zawk leh felfai zawk a awm theihna atan training buatsaih a nih ang ngeiin zirtirtu pawhin zirtir hna mai bakah, office kalphung leh tihtur hrang hrang hre thei tura inzir turin a chah a ni.



W&CD MINISTER

Women & Child Development Minister Pi Lalrinpui’n nimin khan Women & Child Development Field Functionary-te hnenah smartphone a sem.

Women & Child Development chuan nimin khan Dawrpui Multipurpose Hall-ah Early Childhood Care & Education chungchanga inzirtirna leh Field Level-a hnathawhna tur Smart Phones semna hun, ‘Refresher Meeting for Early Childhood Care and Education & Distribution of Smartphones to Field Functionaries Under Women & Child Development’ an buatsaih a, he hunah hian Women & Child Development Minister chu khuallian niin Women & Child Development hnathawhna atana Smart Phones pawimawhzia te, hna langtlang leh awlsam zawka thawhna hmanrua a nih thute a sawi.

Smartphones hi Mizoram hmun hrang hrang-a Anganwadi Worker-te leh field functionary-te hman tura sem chhuah tur a ni a, Minister hian Anganwadi Worker 10 hnenah Smart Phones hi a hlan nghal a ni.

